

續增南嶽志二卷

第六冊

山居古

王香余題簽

氏
萬
十
三
歲
元
甲
子
著
秋

續增南嶽志序

近世文多尙淺顯以新名詞爲口頭禪諸事多用白話而於昔賢近儒之著作嫌其艱深而棄之不思國粹宜保存居今反古裁必及身理固然也余自辛酉歲被眾公推修嶽廟稍間卽覓嶽志查

前所輯多斷簡欲窺全豹無一存者詢諸老宿則曰志板皆焚於兵也志書比尙書更多殘矣且非獨吾邑缺嶽志卽通都大邑徧採訪諸藏書之家而亦不獲嗟乎南嶽爲歷代人才遊覽之所其撰述題詠他人多珍同拱璧矧生長其地忍任消滅而不顧惜乎乃採訪半年僅得李志一部於僧寮因與陽君劭甫商同翻刻復搜括昔之所遺今之所傳分類輯成李太史杜生爲之編次鄭大

令虞琴反相討論陳太史梅生撰序已刊刷成書矣適陽君物故
香余晉省晤康君鳳岑於梧莊承贈明弘治衡山縣志詰所自來
稱曾供職教育部由圖書館抄出趙省長夷午見而悅之捐貲付
梓其敘獄事頗夥蓋弘治前無獄志名爲衡山志獄志寓其中也
厥後彭大令簪姚學政宏謨朱大令袁曠太史敏本李方伯元度
五次所修似皆未見弘治志可知此志久逸而不傳誠難得可貴
矣香余查有已登者去之未登者錄之無闕者汰之有遺者採之
輯成二卷合爲一本以補前志之缺非敢矜能也卽保存國粹之
意俾後之續修者得所取資耳

民國十三年歲次甲子清利節衡山王香余謹撰

續增南嶽志文集卷一

衡山

李子榮
鄭阜康
鑒定王香余補輯

文類

歷代御製

元

加封南嶽爲司天大化昭聖帝諭

上天眷命皇帝聖旨朕惟名山大川國之秩祀今嶽瀆四海皆在
封宇之內民物阜康時惟神庥而封號未加無以昭答靈貺可加
封南嶽爲司天大化昭聖帝以稱朕敬恭神明之至意主者施行
至元二十八年二月日

明

定嶽鎮海瀆各神號詔

奉天承運皇帝詔曰自有元失馭羣雄鼎沸土宇分裂聲教不同
朕奮起布衣以安民爲念訓將練兵平定華夷大統以正永維爲
治之道必本於禮考諸祀典如五嶽五鎮四海四瀆之封自唐世
榮名美號厯代有加朕思之則有不可夫嶽鎮海瀆皆高山廣水
自天地開闢以來至今英靈之氣萃而爲神必皆受命於上帝幽
微莫測豈國家封號之所可加瀆禮不經莫此爲甚至於忠臣烈
士雖可加以封號亦惟當時爲宜夫禮所以明神人正名分不可
以僭差今命依古定制凡嶽鎮海瀆並去其前代所封名號止以

山水本名稱其神郡縣城隍封號一體改正歷代忠臣烈士亦依當時初封以爲實號後世溢美之稱悉與革去其孔子善明先王之要道爲天下師以濟後世非有功於一方一時者可比所有封爵宜仍其舊庶幾神人之際名正言順於理爲當用稱朕以禮祀神之意所有定到各名神號開列於後

一五嶽稱 東嶽泰山之神南嶽衡山之神中嶽嵩山之神西嶽華山之神北嶽恒山之神

一五鎮稱 東鎮沂山之神南鎮會稽山之神中鎮霍山之神西鎮吳山之神北鎮翳無閭山之神

一四海稱 東海之神南海之神西海之神北海之神

一四瀆稱 東瀆大淮之神南瀆大江之神西瀆天河之神北瀆
大濟之神

一各府州縣城隍稱 某府某州某縣城隍之神

一歷代忠臣烈士並以當時初封名爵稱之

一天下神祠無功於民不應祀典者卽係淫祀有司毋得致祭
嗚呼明則有禮樂幽則有鬼神其理旣同其分當正故茲詔示咸
使聞知

洪武二年六月日

祀南嶽祝文

洪武二年歲次庚戌七月丁亥朔越七日癸巳吉尚賓大使臣胡

鉉今蒙中書省點差欽賈祝文致祭於南嶽衡山之神皇帝制曰
磅礴中國之南參窮靈秀生同地形勢巍然古昔帝王祭之察
地利以安民生故祀之曰衡山之神於敬則誠於禮則宜自唐始
加神之封號歷代相因至今曩者元君失馭海內鼎沸生民塗炭
予起布衣承上天后土之令百神陰祐削平暴亂正位稱尊我當
奉天地享鬼神以依時統一人民法當式古今寰宇旣清特修祀
儀因神有厯代之封號予起寒微詳之再三畏不敢效蓋神與穹
壤同始靈鎮南方其來不知歲月幾何神之所以靈人莫能測必
受命於上天后土爲人君者何敢預焉予懼不敢加號特以南嶽
衡山名其名依時祀神惟神鑒知尙享

維正統九年歲次甲子四月庚辰朔越二十四日癸卯皇帝謹遣
翰林侍讀周敘祭告於南嶽衡山之神曰予奉天育民愧涼於德
致茲久旱災及羣生夙夜省躬中心惓切神司方嶽憂憫諒同雨
農以時宜任其責特茲致禱尚冀感通弘布甘霖用臻豐稔匪予
之惠時乃神庥尙享

惟景泰元年歲次庚午閏正月丙午朔越十五日庚寅皇帝遣尙
寶司卿朱禮致祭於南嶽衡山之神曰越茲南土衡嶽爲宗民物
奠安歟功允茂子嗣承大統謹用祭告惟神歆格永佑家邦尙享
維天順元年歲次丁丑六月癸巳朔越二十三日乙卯皇帝遣尙
寶司少卿凌信致祭於南嶽衡山之神曰有衡惟嶽表茲南土奠

安民物厥功茂焉茲予復正大統謹用祭告惟神歆格永佑家邦
尙享

維成化元年歲次乙酉十二月甲戌朔越初四日丁丑皇帝遣中
書舍人解禎亮致祭於南嶽衡山之神曰維神毓秀鍾靈永表南
土奠安民物萬世永賴茲予嗣承大統敢用祭告神其歆鑒佑我
國家尙享

維成化四年歲次戊子六月己丑朔越初四日壬辰皇帝遣巡撫
湖廣都察院右副都御史羅箎祭告於南嶽衡山之神曰比歲以
來多方災沴雨暘不時我民用瘁民之瘁矣予曷爲懷神矜於民
忍降以災德澤崇深孰與神侔祈贊化機溥天之休責躬修行予

敢勿篤庶幾與神同作民福尙享

維成化六年歲次庚寅四月乙丑朔十七日乙丑皇帝遣行人范
鍊致祭於南嶽衡山之神曰去冬臘月七日申時武昌漢陽荆嶽
等府地震永維坤道宜靜動必有由顧予眇躬及茲臣庶政理乖
缺致此咎徵內省勿寧交修敢後惟神作鎮一方民所仰賴特遣
香帛用伸虔告尙祈輔相后土潛消災沴以成參贊位育之功則
予於明神實所切望謹告

維成化十三年歲次丁酉月日皇帝遣巡撫湖廣都察院右副都
御史劉敷祭告於南嶽衡山之神曰國家欽奉明神聿嚴祠祀所
期默運化機庇佑民庶乃近歲以來或天時不順地道欠甯或雷

電失常雨暘炎候或妖孽間作疫癘交行遠近人民頻遭饑饉流離困苦痛何可言惕然於衷罔知攸措特具香帛遣官祭告尚冀體上天好生之德鑒予憂憫元元之意惟神奠鎮一方民所恃賴覩茲災沴能不究心斡旋造化弘闡威靈捍患禦災變禍爲福庶幾民生全遂享報無窮惟神鑒之謹告

維弘治四年歲次辛亥八月乙巳朔越二十一日乙丑欽差鎮守湖廣等處御馬監左監丞劉雅欽差鎮守湖廣總兵官平蠻將軍鎮遠侯顧溥欽差巡撫湖廣地方兼贊理軍務都察院右副都御史謝綬巡撫湖廣監察御史常新湖廣等處承宣布政使司左布政使劉喬右布政使王範湖廣等處提刑按察司按察使司按察使張撫副

使俞振才湖廣都指揮使司都指揮同知高俊等謹以香帛牲醴
遣江夏縣儒學教諭陳冕致祭於南嶽衡山之神嗚呼湖南饑饉
累歲之餘寄民命於草木填餓莩於溝渠雖去年之有獲猶呻吟
之未舒今夏徂秋赤地千里黃白噭噭相委以死雅等痛加修省
遍詣武昌諸祠而率屬懇禱者數矣愈見亢暘全無感應嗚呼此
時不雨非惟西成無望抑恐流疾繼作吾民向日苟存之軀安知
不爲狐狸蠅蚋之肉乎人心驚惶無所控訴恭維南嶽乃三湘之
雄鎮爲百神之依歸望不爲不尊地不爲不重民患極矣神何忍
焉特茲上謁若雅等政乖而令舛私勝而公微或民隱勿恤或天
怒罔聞凡百不職宜殃厥身赤子何辜遭此荼毒於赫靈威轉災

爲福騰六合之雲沛九天之雨氣消黎元之化聲喧田野之歡庶
幾民食足而國稅充公私皆獲其利矣神之賜豈不大歟謹告
維宏治六年歲次癸丑閏五月甲午朔十四日丁巳皇帝謹遣湖
廣等處承宣布政使司左參議章玄應致祭於南嶽衡山之神曰
伏自去冬無雪今春少雨田苗未能播種黎庶實切憂惶子甚驚
惕用是側身循省虔致禱祈惟神矜憫下民幹旋大造早霈甘澤
以滋禾稼以濟民艱庶民有豐稔之休則神亦享無窮之報謹告
維宏治八年歲次乙卯十一月庚辰朔越十五日甲午欽差巡撫
湖廣地方兼贊理軍務都察院右副都御史徐恪巡撫湖廣監察
御史鄭惟桓等敢昭告於南嶽衡山之神伏自今冬和暖如春疫

癘流行死亡相繼江華等邑村落幾空所餘黎庶靡有子遺斯固
陰陽之失序實亦政務之未修咎在恪等民則何辜惟神受命上
天血食茲土寡人之妻孤人之子獨人父母使痛徹蒼穹神亦豈
能追責特具酒醴用伸虔告神其闡揚威靈潛消沴氣庶民有所
賴神亦不愧鎮此一方謹告

維宏治十年歲次丁巳六月辛未朔初四日甲戌皇帝遣巡撫湖
廣地方兼贊理軍務都察院右副都御史沈暉致祭於南嶽衡山
之神曰自去冬迄今春以來亢旱爲虐雨澤少降麥苗枯槁田野
荒蕪黎庶憂惶予甚驚惕惻身循省虔致禱祈惟神矜民幹旋造
化大霑甘澤以濟民艱庶年穀有豐稔之祥則神亦享無窮之報